

Script Of Morning Gojri News Bulletin 08 June 2024 at 1015Hrs

ما رنینگ گو جری نیو ز بلیٹن مو رخہ 08 جون 2024

یوہ آکا شوانی جموں ہے عبدالرحمن شاہین تیں خبر سنو۔

PM President

صدر جمہو ریہ محترمہ درودی مُرمو نے نامزد وزیر اعظم جناب نریندر مو دی نانہہ مرکز مانہہ نویں حکومت بنان با رے مدعو کیو ہے۔ اُن غی حلف برداری غی رسم راشٹر پتی بھون مانہہ پلک شام سو 7 بجے منعقد وے گی۔ جناب نریندر مو دی نے کل صدر جمہو ریہ سنگ ملاقات کر غے نویں حکومت بنان غو دعوی پیش کیو تھو۔ اس تیں پہلاں قومی جمہو ری اتحاد یعنی این ڈے اے غا اک وفد نے بی جے پی غا قومی صدر جے پی نڈہ غی سربراہی مانہہ وی صدر جمہو ریہ سنگ ملاقات کر غے اک چٹھی سوئی۔ جس مانہہ کہیو گیو ہے جے جناب نریندر مو دی نانہہ بھارتیہ پارٹی پارلیمانی جماعت غو لیڈر چُن لیو گیو ہے۔ اس موقع ور صدر جمہو ریہ نانہہ این ڈے اے اتحادی جماعتاں غی حمایت دین بارے خط وی اُن غے حوالے کیو گیو۔ راشٹر پتی بھون غے باہر بولتاں واں جناب مودی نے کہیو جے این ڈے اے اک مضبوط، پائیدار تے ترقی پسند حکومت بناوے گی۔ اُنہاں نے کہیو جے لوکاں نے این ڈے اے حکومت نانہہ اک ہو ر موقعو فراہم کیو ہے تے یاہ 18 ویں لوک سبھا نواں تے نوجوان طاقت ور مشتمل ہے۔ اُنہاں نے مزید کہیو جے اُن غی حکومت مُلک غا لوکاں غی امیدیاں تے توقعات نانہہ پوراں کرے گی۔ نامزد وزیر اعظم نے کہیو جے اک پائیدار حکومت بھارت، ات غی اقتصادیات تے نوجواں واسطے فائدہ مند ثابت وے گی۔ اک سماجی ذرائع ابلاغ پوسٹ مانہہ راشٹر پتی بھون غی طرفوں کہیو گیو ہے جے صدر جمہو ریہ محترمہ درپتی مُرمو نے اج آئین بند غے تحت حاصل اختیارات غو استعمال کرتاں واں جناب مو دی نانہہ غا وزیر اعظم غا عہدہ ور مقرر کیو ہے۔ صدر جمہو ریہ نے جناب مو دی نانہہ گزارش کی ہے جے وے مرکزی کا بینہ مانہہ شامل ہون آلا مرکزی وزراء، کونسل غا ممبراں غی تعیناتی با رے اُنہاں نانہہ نایاں غو مشورہ دیں۔ تے راشٹر پتی بھون مانہہ نویں حکومت غی حلف برداری منعقد کروان با رے تاریخ تے وقت دسیں۔

EC JK Polls

چناؤ کمیشن غی طرفوں جموں کشمیر مانہہ ستمبر مہینہ تک اسمبلی چناؤ کران با رے اپنا عزم ور چلتاں واں یوہ فیصلو کیو ہے جے جموں کشمیر قانون ساز اسمبلی غا عام انتخابات بارے چناؤ نشان دتا جان با رے سیاسی جماعتاں غی طرفوں درخواستاں نانہہ فوری طور ر منظور کیو جائے۔ واضع رہ جے عدالتِ عظمیٰ سپریم کورٹ نے پول پینل نانہہ پچھلے سال دسمبر مہینہ مانہہ ہدایت دتی تھی جے جموں کشمیر مانہہ 30 ستمبر تک اسمبلی چناؤ کروا دتا جائے۔ بھارتیہ چناؤ کمیشن غی جاری اک پریس بیان مانہہ کہیو گیو ہے جے جد کہ تسلیم شدہ قومی وریا سٹی جماعتاں کول تے اپنا مخصوص چناؤ نشان ہیں مگر رجسٹرڈ غیر تسلیم شدہ جماعتاں نانہہ چناؤ میدان مانہہ امید وار اُتارن واسطے چناؤ نشان لین بارے درخواست دینی وینگی۔ واضع رہ جے حال ہی مانہہ منعقد ہوا لوک سبھا انتخابات غے دوران جموں کشمیر مانہہ ووٹراں غی شمولیت غا جذبہ نانہہ دیکھتاں واں اعلیٰ چناؤ کمشنر راجیو کمار بوراں نے کہیو تھو جے پول پینل بہت جلد مرکزی زیر انتظام علاقہ جموں کشمیر مانہہ اسمبلی انتخابات منعقد کروان با رے عملی کاروائی شروع کرواے گو۔

CS

چیف سیکریٹری جناب اتل ڈلو نے کل جموں مانہہ توی دیور فرنٹ تے مصنوعی جھیل ترقیاتی پروجیکٹ ور چل رہا کم غی پیش رفت غو جائزو لیو۔ میٹنگ غے دوران چیف سیکریٹری موصوف نے بکھ بکھ محکمان بشکا ر تال میل، نزدیکی نگرانی تے ویلے سر پروجیکٹ غی تکمیل غی اہمیت ور زور دتو۔ جس غو مقصد جموں غی جمالیاتی خوبصورتی تے کشش نانہہ بدھانو ہے۔ میٹنگ غے دوران موڑ غاکم، چھوٹی نہراں غا گیٹ نصب کرن تے زمین غا رہا نشی، تجا رتی و تفریحی استعمال طرز وغیرہ بارے پروجیکٹ غی پیش رفت بارے تبادلہ خیال کرتاں واں چیف سیکریٹری موصوف نے تیز رفتار تے معیاری تکمیل غی ضرورت ور زور دتو۔

Samba

بین القوامی سرحدور سانہہ ضلع غا ریگل علاقہ مانہہ کل دیر رات فائرنگ غا اک واقع مانہہ اک مزدور شخص ماریو گیو ہے۔ سانہہ تین آکاشوانی غا نامہ نگار سہتال شرما نے ایس ایس پی سانہہ غا حوالہ سنگ دسیو ہے جے مرن آلا شخص غی پشان 28 بہراں غا وسودیو غے طور ہوئی ہے۔ جہیڑو کہ اکھنور علاقہ غو رہن آلو تھو۔ اس واقع غے فوراً بعد ایس ایس پی سانہہ ونے شرما تے بی ایس ایف غا سنئیر افسر ات پُجیا۔ اس فائرنگر غا واقع غو پتو لان بارے مزید تحقیقات جاری ہے۔

LG Arrangement

لیفٹنٹ گورنر منوج سنہا نے کل اک اعلیٰ سطحی میٹنگ غی صدارت کرتاں واں آتا سالانہ ماتا کھیر بھوانی میلہ تے عید الضحیٰ غا تہوار غا تناظر مانہہ ضلع انتظامیہ تے بکھ بکھ محکمان غی طرفوں تیاریاں غو جائزولیفٹنٹ گورنر نے ڈپٹی کمشنراں تے سنئیر سپرنٹینڈنٹ آف پولیس نانہہ ہدایت دتیں جے وے اہم مذہبی مقامات غو خود ذاتی طور دورو کریں تے احسن اور پُر امن میلو و تہوار منعقد ہونو یقینی بنان بارے ضروری اقدامات عملویں۔ لیفٹنٹ گورنر نے صوبائی کمشنراں تے رلیف کمشنراں نانہہ کہیو جے وے ماتا کھیر بھوانی میلہ غے دوران دائرین غی بہتری و سہولیات بارے نگرانی و نزدیکی تال میل رکھیں۔ انہاں نے متعلقہ ڈپٹی کمشنراں نانہہ مزید کہیو جے وے شرائین ور سہولیات غو موقع ور جائزو لیں۔ چیف سیکریٹری اتل ڈلو، ڈی جی پی آر آر اس سوین، صوبائی کمشنر، ڈپٹی کمشنرز تے سول و پولیس انتظامیہ غا دوجا سنئیر عہدیدار وی اس میٹنگ مانہہ ات موجو دتھا۔

Eid JK

جموں کشمیر مانہہ عید الضحیٰ جس نانہہ بکر عید غے طور ور وی جانیو جائے۔ اس مہینہ غی 17 تا ریخ نانہہ منائی جائے گی۔ اخباری نمائنداں نے جموں کشمیر غا مفتی اعظم مفتی ناصر السلام غا حوالہ سنگ دسیو ہے جے اسلامک کلینڈر غا آخری مہینہ غو چن کل شام نانہہ نظر آگیو ہے۔ تے اس طرح ہون عید الضحیٰ غو تہوار 17 جون نانہہ منایو جائے گا۔

Weather

جموں مانہہ حالانکہ زیا دہ توں زیا دہ درجہ حرارت کل 38 عشاریہ 6 ڈگری سلیس ریکارڈ کیو گیو۔ مگر جموں تے اس غا مضافا تی علاقان مانہہ آبر آلود موسم سنگ اج سویر تیں ہی موسم خوشگوار بنیو وہ ہے۔ محکمہ موسمیات غا دفتر غے مطابق اج تے پلک نانہہ کُجھ اک مقامات ور گرج چمک سنگ ہلکی بارش ہون غو امکان تے 10 جون تیں بعد گرمی غی لہر پھر بدھ سکے۔

اس غے نال ہی خبراں غو یوہ بلیٹن ختم ہوؤ۔

News Read By:-Abdul Rehman

News Editor:-Manoj Kumar

DEO:. Alam Khan

Skilled:-Rajat Paul